

1 Yohane

Yohanenjo Kibi Mikepka Qeke, Don Gegeinerop Didiwo Wakonge

¹ Mokaka qei kino njineka kieke pa sari mage pake, yewa njene ketzenjo detkone, so deze welenjo kakone, welekatne, njene dezenjo ka more metezenjo makone, gege togon Wane Don iwa qe njibonmaine.

² Gege wele didiwo wakonlukki kakone, paki gege togon wane don kisiine iwa ra wakone njidanmaine, gege togon yewa Magak wano njine pa sari mage njenano didiwo wakongi kamaine.

³ Kine kine kakone so detkone, ea wane njene ra qelanjane njine wenenj yalewaka njidanmaine, njidannjem detpi paki, njine njenano takotkeu wetze weku qeturage gekenane, pakimo wet weku gegeze yewanj Magak Anutu so Gipole Yesu Kristo erano kito more payake.

⁴ Yalewa paki, njenano wet peseknj maine watke more payakane kibi iwa qe njibonmaile.

Anutu Ene Qelangan

⁵ Iwa yemo donkisi Gipole Yesu wano detkonane more, njine ra wakone njidanmaine, Anutu enej qelangan, enjano panaman mane mi pamaike.

⁶ Ea wane njene wet weku Anuturop gemaine ranjem paki, yewaoka panamango gekene, pakimo donze yewa mo isi okangi, njene don wele yewa mi magekene.

⁷ No Anutu enjine qelanango gemaiké, yalewaka njene qelanango gekeneo, yemo njene doku tau tau nei natne enjrop wet weku kima kima okane gekene, pakimo Gipole Yesu wane Wenjemineno sot turunj kine kineze ea saukki libeka qekene.

⁸ No njene sot turunje mane mi pamaiké yale raikeneo, yemo njedomka wetze isikaikene, pakimo don welekatne yewanjo njenane kotozo mi payake.

⁹ Njéne borikineze rapok warekeneo, yemo Anutu enjé mi qelinj njoniaké, midakaka, enjé masi koboine okangi paki borikineze qeligeaké, so tanik manikze qotkoine yewa ma biraki ariki njéne libeka qekene.

¹⁰ No njéne iwa yale raikene njéne sot mane mi ma okangone, ea rakeneo yemo, Anutu wane don ranjem, isi don yale okaniaké, pakimo enjéne donjo njenane kotozo mi payake.

2

Kristo Enjé Njéne Qesi Qesinj

¹ Gipon borasokopne, borikine mi maikei wane girem don iwa qe njibonmaile, njé nei mane enjé borikine mayaké, yemo qesi qesinjze koboboine, Magak korop gemaiké, Yesu Kristo yewa desiaké.

² Kristo onjomka sot turunje mataliki siukeakane urataine make, so enjé njéne sot turunje mataliki siukeakaneka urataine mi make, midakaka! Enjé kepe banjem nei njerep korop enjéne borikinane turunj wenenj qelinje.

³ No ɲene Anutu wane don teweckeneo, yemo ɲene iwa yale desikene, ɲene eɲe detlukkamaine, yale okaniake.

⁴ No ɲei mane eɲe rayake, “Na Anutu detlukka-maile,” yale raki paki, aɲaine mi tewekeake, ɲei yaline eɲe isi ɲei, wane ɲei yaline eɲane kotino don welekatne mane mi pamaike.

⁵ No ɲei mane eɲe Anutu wane don tewekeake, eɲe Anutu wet maep wele okankayake, ɲene yalewa okon okane more Anuturop gemaineo, yemo ɲene Anutu wano makatake gemaine, yale okaniake.

⁶ No mane eɲe rayake, “Na Anuturop gemaile”, yale rayake, eɲe Yesu Kristoɲo okange, yale Anuturop geake yemo menageake.

Kima Kima Okane Qelanango Gekene

⁷ Kima maepkopne, na don iwa qe ɲibonmaile, yewa don musele mida, iwa mo ramatok don sogine, ɲine mo qei bano kine dere mage sakoi, ramatok don sogine yewamo miti don, ɲine mo alakanka detkoi.

⁸ No don iwa qe ɲibonmaile, yemo don musele, so ea wane weleine yemo Kristoɲo kotozo urata make, yewao kakone, panaman mo mida lele arikimo, qelangan weleno qelanganmaike.

⁹ Ea wane ɲei mane eɲe iwa yale rayake, na qelanjango gemaile, raki paki kimaine qaisik kayake, eɲe naso yewaoka panaman koto geake.

¹⁰ No ɲei mane eɲe kimaine wet maep okan kayake, eɲe qelanjangoka ge ariake, eɲe numa mi qeyayake, paki eɲano ɲine kine kine natneɲo ɲei natne mi ebuki borikine maikei, midakaka!

¹¹ Njoni manehi ehe kimanee qaisik kayake, ehe panaman koto geki paki panaman wane numao arimaake, eamo mi desiake. Onoka wane Panamanjo maki deine mupkemaake ea wane ehe numa maine me qotkoine eamo maine mi kayake.

¹² Gipon borasokopne, Kristo wane enet wane Anutujo borikinejine qelinqi siukwareke eawane don iwa qe njibonmaile.

¹³ Magakop, njine mokaka qei kino njine Njewa ge sari geke, so gemaake, enane kine detlukkamami, ea wane don iwa qe njibonmaile. Njoni medep, njine mo Satan njadeka more qelinq kamami, ea wane don iwa qe njibonmaile.

¹⁴ Medep nigatne njine Magak Anutu detluk kamami, ea wane don iwa qe njibonmaile. Magak njine mokaka qei kino njine ge sari geke, so gemaake, Ehe detlukkamami, ea wane don iwa qe njibonmaile. Njoni medep qaluwit, njine zonom njine pamaake, so Anutu wane donjo koto njino pamaake, paki Satan njadekkamami, ea wane don iwa qe njibon maile.

Njone Wetze Kepe Abogo Misuk Payake.

¹⁵ Wetjine kepeo me kepe wane abogo misuk motpi payake, njoni njine wetjine kepeo motpi payake, yemo njine wet maep njine Magak wane yewano njinane koto njino mi payake.

¹⁶ Kepeo njine kine kine korop, solano bailalan, me denjo ka so bailalan, so wawaine kine kine, njoni njerep ehe ka more wawaine okan okanmami, yewa mo Magak wanonjine mi sarimaake, mida! Wawaine korop kepeo njine.

¹⁷ Kepe so abonj kine kineine kepe kutno paki, nei n̄rep eje ka more bailalanj okan okanmami, yewa korop mida sololokeake, n̄o Anutu wane don dere tewek okanmaike eje yemo naso banjem ge ariake.

Kristo Wane N̄baine Wakonge

¹⁸ Gipon borasokopne, naso mo bomilemaike! Kristo wane n̄baine wakoniakane rakoi, wane ukude yemo Kristo wane n̄bakoune mo loutne wakone gewaremami, pakimo n̄ene detmaine, naso mo bomilemaike.

¹⁹ Nei n̄rep magu iwa eje welekatne n̄enane magu midakaka, yalinane biran̄one arikoi, eje n̄enane magu wele gekoi ra, yemo n̄nerop geurap, n̄o eje silun̄j biran̄ongoi, paki kine iwa yale wakonge, eje welekatne n̄enane magu wele midakaka.

²⁰ N̄o n̄ine yemo Kriston̄o Asu Koboboine n̄ibongane dereret n̄inerop okane don welekatne yewa detlukmami.

²¹ N̄ine don welekatne ea wane kine n̄an̄aemami, yale rawe paki kibi iwa mi qe n̄ibonmaile, midakaka. N̄ine mi n̄an̄aemami, n̄ine mo detlukmami, so don welekatne yewao n̄ine isi don mane mi wakon okanmaike, yewa n̄ine mo wenen̄j detwaremami.

²² Pakimo nei isi don rara eamo ma? Ea mo nei mane, Yesu wane Mesia, Anutun̄o birakaki ketke, mida rayake on̄o, eje Magak so Medep wenen̄j eretnarek qaisik osiake, yale okangi paki Kristo wane n̄baine okaniake.

²³ Nei mane enje magak qaisikkaki paki, medep yalewaka qaisikkayake, ŋo mane enje Medep kima okankaki paki, Magak yalewaka kima okankayake.

²⁴ No qei kino miti don detkoi, yewaka togole malipka gekei, miti don yewa wetke togole malipka geu paki ŋine baŋ, naso baŋem Medep so Magak ererop tako rakot ge arikei.

²⁵ So Kristo oŋom kine kine ŋeboniakane ŋedaŋge, yemo gege togon.

²⁶ Wet ma siuk okan ŋungei wane ra okanmami, enane rawe paki kibi iwa qe ŋibonmaile.

²⁷ No ŋinane, yemo Kristoŋo Asuine ŋibonge, yewaŋo ŋinano payake, Asuŋo ŋinane koto ŋino geki, ŋine ŋei maneo kito ŋiboniakane mi ŋaŋaekei, Kristo wane Asuineŋo kine kine korop ea wane kine kito ŋiboniake, eamo don welekatne kito ŋidaniake, ea mo isi midakaka, ea wane ŋine Asuŋo kito ŋidaniake, yewa tewekeu paki, Kristo wano kito togole gekei.

²⁸ Welekatne, gipon borasokopne, Kristo wano kitou togoleu paki gekei, paki Nasoo enje didiwo sariake, yewao ŋene maine togole okorakene, ŋene enane kaitko kaet so gamu gamu okane mi siukkene.

²⁹ ŋine mo detmami, Kristo enje koboboine, ŋine yalewaka iwa yale desikei, ŋei mane enje masi tanik koboboineka okane geake, enje Anutu wane medep.

3

Anutu Wane Nerep Medep

¹ Detmami, Magakɲo wet maep zok manerop okanɲonge! Eɲe wet maepine zok kakapa suaine pamaikane, ɲene Anutu wane ɲerep medep ɲedorake, iwa yemo welekatne, kine yalinane kepeo ɲei ɲerep eɲe Anutu wane mi detkoi, so ɲene yalewaka mi detɲonmami.

² Kima maepkopne, ɲene ukude Anutu wane ɲerep medewekoune okane gemaine, baɲ ɲado daleo okane gekene, eamo mi wakongi detlukka-mainne, ɲo siluɲ iwa yale detmaine, ɲado Kristo lotkeake, naso yewao, eɲine kait toɲaine tokso giridiɲ kaɲem paki eɲine rokop okanikene.

³ ɲei korop eɲe weteneɲo Kristo wane dereret so tomaka gekei, eɲe edom yale okanbi paki, Anutu wane kaitko libe ɲe more gemami, so eɲe Kristoɲo libe ɲotɲole gemaikne, yale gekei.

Borikine Ma More Satan Wane Medep Natne Okanikei

⁴ ɲei mane borikine mayake, eɲe Anutu wane Ramatok Don yewa yuanmaikne so gemaikne, onoka wane, borikine yewaɲo Ramatok Don ɲeɲe okanmaikne.

⁵ No ɲine mo detmami, Kristo eɲe ɲei ɲerep sot turuɲene ebu ma wareakane lotkeke, eɲe borikine sot mane mi pamanmaikne.

⁶ Mane eɲe Kristorop geake, eɲe takotke borikine mi mayake, ɲo mane eɲe borikine takotke mayake ɲene raikene eɲe Kristo mi kake so mi detkake, yale okaniake.

⁷ ɲerep medewekopne, ɲine kaulukei, ɲei natneɲo isinunikei. ɲei mane tanik manik koboine

mamaike, eɲe ɲei koboboine Kristoɲo geke, eawane rokop.

⁸ Mokaka qei kino kieke more, Satano borikine kine kine mamaɲke, eawane ɲei mane eɲe borikine mamaikeo, yemo eɲe Satan wane ɲei me medep okanmaike. Paki Anutu wane Gipole eɲe didiwo sari lotke more, Satan esopkaki paki, urataine weneɲ mataliki siuke mida leleke.

⁹ ɲei mane Anutu wane medep geake, eɲe borikinane tanik manik takorakot mi mayake, onoka wane, Anutu eɲine gege mage so tanik manikɲo eɲano pamaike, so Anutu eɲe eɲine magaine, ea wane eɲe borikine mi takotke mayake.

¹⁰ Anutu wane ɲei ɲerep so Satan wane ɲei ɲerep eɲane kine keueno pamaike, yemo iwa didiwo wakonmaike, ɲei mane eɲe tanik manik koboboine mi okaniake, me kimaine wet maep mi okankayake eɲe Anutu wane medep mi okaniake.

Wet Maep Maneno Mane Okannagu Gekene

¹¹ Mokaka biɲek don mane iwa yale detkoi, ɲene kima kopze wetzeɲo wet maep okan ongene.

¹² ɲene Kain yale misuk okanikene, Kain eɲe Satan wane biɲek ea wane eɲine ɲole qeke, Kain eɲe onoka wane ɲole qeke? Yemo kine iwa yale wane, Kain eɲe kine kine wa okange, eamo qotkoine, ɲo ɲoleɲo kine kine wa okange, eamo mayakatne, ea wane.

¹³ Kimakopne, kepe ɲei kimakop ɲine eɲe ɲaba okanɲunbi, ɲine misuk qisekei.

¹⁴ ɲene iwa yale detmaine, ɲene seu seu qeliɲka more sari gegeo waketɲem paki wiekone, ɲene

yewa detmaine, onoka wane nene kimakopze Anutu wane nei nrep wet maep okanon okanmaine, ea wane. Nei mane ene kimakoune wet maep mi okanoniake, ene seu seuneka geake.

¹⁵ Nei mane ene kimaine qaisik kayake, ene kawali qeqe, pakimo nene mo detmami, kawali qeqe nei yewa ene geqe togon mane mi pa manmaike.

¹⁶ Kristo ene nenane raki paki gegeine qaisikkake, ea wane nene detnem wet maep wele okan maike, so nene yalewaka kimakopze enane ranem paki gegeze qaisikkanem menageake!

¹⁷ Nei mane ene kepe wane nara abon moriaine zok manerop pa manmaike paki, kimaine mane ene nara abonine midaine geki ka qewolon okangi paki, qomine ma walukeake, paki nene daleo raikene, ene Anutu wane wet maepno kotino mi pamaike!

¹⁸ Gipon borasokopne! Nenane wet maepze yewamo donnoka me anazenoka misuk raikene, ea mo wet maep wele, metezeno so wetzeno manem deenenjo wele kaikei, Anutu wane don teweke more kaet midaine Anutu wane kaitko maine okorakene.

¹⁹ Yale okannem, don wele ea wane magu gemaine, ea wane kine wakoniake, pakimo nene wetzeno qebin mabin nebuki Anutu wane kaitko maine nene wetze ma pesekaikene.

²⁰ No wetzeno nenguyake yemo, nene mo detmaine, Anutu ene nenane wetzane rokop yuankamaike, ene rokop mane geki paki kine kine korop ea wane kine detwaremaike.

²¹ Pakimo kima maepkopne, nene wetzeno mi

ngenguyakeo, yemo nene Anutu wane kaitko to-gole okorakene.

²² Nene kine kine yewa me yewa wane geke more ranem neboniake, onoka wane nene pidonine tewekmaine so enane kaitko maine genjem yale okannoniake.

²³ Pidonine iwa yale, nene Gipole Yesu Kristo wane enetine detlukkaikene, so Kristo pidonine rake, ea wane rokopko nei kima kopze enerop wet maep okannagukene.

²⁴ Nei mane ene Anutu wane pidonine tewekeake, ene Anutu gotkayake, paki Anutuño nei yewa yalewaka gotkayake, Anutuño gotñone gemaiké, yemo Asu nebonge eno ra wakone nedangi detokanmaine, yemo Anutu ene nenerop gemaiké.

4

Asu Welekatne So Asu Isisine

¹ O, kima maepkopne, nene nei korop ene Asu pa nebonmaike, rau detpi wele misuk okaniake, nene liwekone more kineene kaikei, ene Asu ma gemami, yewa Anutu wanoñine sarimaike me mida, yewa detlukkei, propet isisine loutne wakongoi, kepe banem rokopke ge waremami.

² Nene kineene yemo iwa yaleoken desikei, Asu mane ene Yesu Kristo welekatne nei okange, yewa raulukeake, Asu yewa ene Anutu wano nene nei yewa enano pamaiké raikene.

³ No Asu mane ene, Anutuño Yesu mi birakake ketki paki nei mi leleke, eno bisop kayake, asu yewa ene Anutu wanoñine mi ketke, ene Kristo

wane Nɔbaine eŋano ɲine sarike. ɲine eŋane det okanmami, eje kepeo wakoniakane rakoi, wane iwa yemo eje mo wakonge gemaiké.

⁴ Gipon borasokopne, ɲine yemo Anutu wane biɲek ea wane propet isisine mo ebu ket biraon warekoi, onoka wane Asu yewa ɲinane koto ɲino gemaiké, eŋane zonomine yemo togogole, kepeo ɲine asu eŋane zonom korop yuanka waremaiké.

⁵ ɲei propet isisine iwa eje kepeo ɲine, ea wane donene yewa kepe donka okanmaiké, paki kepe ɲei eje ketene more don yewa det okanmami.

⁶ ɲo ɲene yemo Anutu wane biɲek, mane eje Anutu detkamaikéno ɲenane don desiaké. Mane eje Anutu wano ɲine mi wakongéno, yemo donze mi desiaké.

Don welekatne ea wane Asu so isi don wane asu erane kineetne yalewao wakongi ka more maine raikene.

Anutu Eje Wet Maep

⁷ Kima maepkopne! ɲene manéno mane wet maep okannagukene, onoka wane wet maep yewa yemo Anutu wanonine sarimaiké, wane ɲei mane eje wet maep korop geake, eje Anutu wane medep okaniake, so Anutu detkayake.

⁸ ɲei mane wet maepine midaine geake, eje Anutu mi detkayake. Onoka wane, Anutu eje wet maep wane kine so welaine.

⁹ Anutu eje iwa yale okangi paki, wet maepine ɲenane ra more sikanɲonge, eje gipole wemedep weku birakaki kepeo ketke, ɲene Yesu wane ra more gegeze marat kaikenane, yale okange.

¹⁰ Wet maep wane kine iwa yale pamaiké, ɲedo Anutu wet maep mi okankakone, midakaka,

Anutuŋo ɲene wet maep okanɲongi paki, Gipole talekaki ket more, borikinezane turuŋ qekokki paki ɲebu make. Ɗei wet maep mi okanone more Anutuka wet maep okanka okanka ea mo mi pamaike.

¹¹ Kima maepkopne, Anutuŋo wet maep yale okanɲongane ɲene yalewaka, kimakopze eɲerop wetzeŋo wet maep okan nagukene.

¹² Anutu ɲene dezeŋo mi kakane, ɲo siluŋ ɲene ɲedomka wetzeŋo wet maep okan nagukeneo, yemo Anutuŋo kotozo geake, paki eɲane wet maepɲo ɲenane kotozo sua leule okaniake.

¹³ Ɗene onoka wane maine Anutu detluk kamaine? So eɲe ɲerop gemaike, me ɲene eɲerop gemaine? Eɲine detluk kamaine, yemo Asuine ɲebongane ɲene iwa yale detmaine, ɲene Anutu qotkamaine ɲo Anutu eɲe ɲene qotɲonmaiike.

¹⁴ Magak, eɲe Gipole talekaki kepe baɲem ɲei korop ɲebu mainɲone eɲino biranɲoniakane ketke, paki ɲene dezeŋo kaulukkonane don yewa raulukon okanmaine.

¹⁵ Ea wane ɲei mane eɲe Yesu Anutu wane Gipole, yale raulukeake, eɲe Anutuŋo ɲei yewarop geake, ɲo ɲei yewaŋo Anuturop geake,

¹⁶ pakimo ɲene ɲedom Anutuŋo wet maep okanɲonge, yewa detmaine so detlukkamaine.

Wet Maep Koropɲo Kaet Mi Ma Geake

Anutu eɲe wet maep wane kiewowoine, ɲei mane wet maep korop geake eɲe Anuturop geake, ɲo Anutuŋo eɲerop geake.

¹⁷ Wet maep wane wele ɲenano wakon lukmaiike, eamo iwa yale. Ɗene gegeze kepeo

gemaine, eamo Kristo wane rokop. Ea wane ɲene banj Wano Wanok Naso suaine yewao, kaet mi okane more togole okorakene.

¹⁸ Kaet so wet maep ere kima kima mida, wet maep wele yewano kaet korop esopongi saket ariwarekei, kaet eɲe kawali ma okanmai ke, ea wane mane eɲe kaet mageake, enano wet maep maine mi pamaike, yale raikene.

¹⁹ Anutuɲo alakane more wet maep okanɲonge, ea wane ɲene wet maep korop gekene.

²⁰ ɲei mane eɲe rayake, “Na Anutu wet maep okankamaile,” raki paki kimaine qaisikkayake, eɲe isi ɲei, ɲei yewa eɲe ɲei kimaine deɲo kakaine, eɲe qaisikkaki paki, daleo Anutu deɲo mi kakaine, eɲe wet maep okankayake me? Midakaka!

²¹ Ea wane Kristo wane pidon iwa yale ɲebonge, mane eɲe Anutu wet maep okan kaki paki, ɲei kimaine weneɲ yale waka wet maep okankayake.

5

Mali Malip Korop ɲo Kepe Wane Tanik Manik Borikine Maket Birakayake

¹ ɲei maneno Yesu wane Kristo raki paki malip kayake, eɲe Anutu wane medep, ɲo mane eɲe magaine wet maep okankayake, eɲe medep yale-waka wet maep okankayake.

² ɲene Anutu wet maep okanɲem paki, pi donine tewekkeneo, yemo Anutu wane ɲei

ņerewekoune wet maep okanonmaine, yewa wane kine ęe wakoniake.

³ Ȇene Anutu yaup mi wet maep okankaikene, so eņane pidonņo ęenano umatne mi okanmaike, midakaka,

⁴ onoka wane, Anutuņo eņane ęerep medep gege togon ebonge, eņe kepeo umat me wikile kine kine ęine korop kito peseki ket okanmaike, yemo ęenze mali malipņo, yalewa oken okane more kepe wane tanik manik yuanka ma pesekakene.

⁵ Maņo kawali ęe yuangi paki kepe wane tanik manik ma pese okanmaike? Ȇei mane eņe Yesu, Anutu wane Gipole, yale raki paki malipkayakeņo weku yale okaniake.

Anutuņo Yesu Kristo Wane Don Didiwo Ra Wakonge

⁶ Yesu Kristo eņe wekuņo lotkeke, eņe dokuņo tauon tauon ea wane tanik manik so kibego weņemine ket ket, ea wane tanik manik yewarop sari lotkeke, eņe dokuropka mi sari lotkeke, eņe dokurop so weņem gorop weneņ sari lotkeke. Asuņo oņom kine ra wakone ramaike, iwa welekatne, onoka wane, Asu eņe don wele ea wane welaine so kine.

⁷ Anutu wane don ęei karewe edo ra wakon okanmami.

⁸ Asu, doku so weņem, eņe karewe, ęo kineene yemo weku.

⁹ Ȇeiņo don ęesi ęesiņ okane rau detņem, welekatne okan okanmaike. Ȇo Anutuņo donine ęesiņkake, yemo wele zok manerop okan

okanmaike, eɲe Gipolane don qesiŋka more ra wakonge.

¹⁰ Ea wane ɲei mane eɲe Anutu wane Gipole detlukkayake, eɲe Anutu wane don wele eaɲo kotino pamaniake. Ɗo mane eɲe Anutu wane don detki don yauwine okangi mi detlukkayake, paki Anutu eɲe isi ɲei yale okaniake, ɲei yaline eɲe Anutuɲo Gipolane kine ra wakonge, ea mi dere malipkayake.

¹¹ Ɗene tanik manik yaline eaɲo sikan ɲonmaike, yemo Anutu wane don eamo welekatne, Anutu wisika gege, so gege togon ɲebonge, ea wane kine so welaine yemo Gipolano pamaike.

¹² Ɗei mane eɲe Anutu wane Gipolerop gemaikɛ, eɲe wisika gegeine pamaikɛ, ɲo mane eɲe Anutu Gipolerop mi gemaikɛ, eɲano wisika gege ea mo mane mi pamaikɛ.

Wisika Gege So Gege Togon Mat

¹³ Na don iwa gemaile, yemo ɲine ɲei ɲerep korop Anutu Gipolane eɲetine dere malipka gemami, ɲine maine desikei, ɲene Gege Togon mo makone, yale desikei.

¹⁴ Ɗene Anutu wane kaitko togole gekene, onoka wane ɲene yale detmaine, ɲene kine kine mane wane Anutu wane simile pamaikɛ, yewao mogare meɲenkaɲem eɲe meɲe meɲenze detki paki ɲeboniakɛ.

¹⁵ Ɗene meɲenkaikene rokop, eɲe detɲoniakɛ, iwa welekatne, ɲene yalewaka detɲem paki kine kine oɲo ɲeboniakane meɲenkaɲem eɲe ɲeboniakɛ.

¹⁶ N̄ei mane eje kimaine kaki borikine mayake, borikine yalinen̄o tebakaki seu seu wane rokop mi okaniake, eje yaline kaki paki, Anutu mejenkaki on̄o gege togon maniake, iwa yemo n̄ei borikine ewekine ma okanmami, eñane ramaile. N̄o borikine umatnen̄o tebaongi seu seu wane bin̄ek oka okan eje pamaike, n̄o na yaline eñane Anutu mejen kaikenane mi ramaile.

¹⁷ Masi tanik qotkoine korop yewa eje sot turuñ wenen̄ okanmaike, n̄o borikine natne yemo tebaongi seu seu mi arikei.

¹⁸ N̄ene iwa yale detmaine, n̄ei n̄erep Anutu wane dokoine okane gege togon gemami, eje borikine takotki takot mi ma okanmami, onoka wane eje Anutu wane Gipolen̄o warekaki tikñanen̄ gemaik̄e, wane Satann̄o maine mi matalikayake.

¹⁹ N̄ene detmaine, n̄ene Anutu wane n̄erep medewekoune, n̄o kepe ban̄em korop Anutu wane don n̄adekka okanmami, eje Satan n̄o n̄ei waom okan ongi eñane bango gemami.

²⁰ N̄ene iwa yale detmaine, Anutu wane Gipole eje ketki paki, wet dereretze ma wakone n̄ebongane, n̄ene Anutu welekatne eje detka okanmaine, n̄enane gegezen̄o yemo Anutu welekatne eñano pamaik̄e, so Gipole Yesu Kristo wano wenen̄ pamaik̄e, eje Anutu welekatne so iwa eje gege togon.

²¹ Gipon borasokopne, n̄ine Anutu isisine yewa korop n̄adekon warekei!

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

646541a1-8d36-5993-802c-6bb850da5963